

Servicio bunita , agradable, amable y cu sonrisa na Aruba

Nos ta gaba cu servicio cu ta ser duna riba nos isla, pero esey ta srvicio di 20 aña pasa bay atras pa 50 aña pasa. Aruba no tin servicio mas!

Lagami haci mi recorrido den Caya Betico Croes.

NO TA LABA MEA SUSHI

Mi a drenta e lugar renombra pa paña.

Un familia Arubano cu turistanan venezolano tabata mi dilanti.

Meneer "abogado" kier a compra un paar di zapato, y e mucha muher a trece mea pa e bisti.

Meneer a mira e mea, bisa e "señorita" (na spaño naturalmente) "E mea ey parce 'sucecita'."

Señorita cu no a compronde of a haci manera e no a compronde a conteste na un manera arrogante: "Ki bo ta kere, cu mi ta bay laba e mea ey pa bo bisti?"

Mi a bira rond, bisa esnan arubano.

"Sali di aki manera ami ta haci awor! Bay na Chipi Chipi!"

Mi a topa nan berdad den Chipi Chipi mas o menos mey ora despues.

MIL FLORIN BENDI

Papiando cu e señora, el a splica cu nan a drenta varios pacus pa paña y otro necesidadnan, y a sali di tur.

Na un Bon Bini cu ARUBANONAN, e homber a gasta casi mil florin na compras den un tira, pa e servicio cu el a haya.

El a contami kico a pase den un establecimiento cu ta bende tambe perfumeria, den cercania.

El a puntra pa cierto marca di shampoo, y e contesta corta cu cara zuur tabata: "Aqui no hay!! y señorita a bira lomba cana bay laga nan.

Mi a drenta, puntra pa e mes marca "Shine" cerca e mes señorita cu nan a indicami.

"Aqui no hay!" mi tambe a tende, y shon "indio" a yega cerca.

"What happened!"

Mi di cune: "Your service is marvelous!"

Cu sonrisa riba cara: "Yes!"

Mi di cune, "yes no!. Bo a caba di perde prome cumi un venta grandisimo di bishitantenan venezolano y bo a caba di perde benta cerca mi. Danki pa bo servicio!" y mi a sali bay.

BAN KEIRO CUMI

Den Havenstraat, mi a drenta un establecimiento unda mi a mira algo cu mi kier a check su prijs.

Mi a bin haya un "americano" (residencia aki) ta lucha cu un bendedor cu no ta compronde nada. E dama "hulandes" a bira mirami y a laga sa: "zij verstaat geen engels en ook geen nederlands".

Otro hulandes a drenta, cana rond ey banda, yama otro señorita, puntra algo, y cana bay pasando banda di nos.

Nos a puntre kico a pasa, y el a splica kico e kier a compra, pero e bendedor no ta compronde ni hulandes, ni papiamento kibra cu e ta papia.

Nos tur a sali hunto, y mi a cana bay cu nan na La Linda pa un keiro chiquito.

Aki e ARUBANONAN a complace nan cu tur cos cu nan mester y den NAN IDIOMA.

NOS NO TA BENDE PLASTIC

Un otro caso ta locual a pasa dialuna merdia.

Na altura di establecimiento fast food di Caya Betico Croes, mi a topa cu un conocir di mi masha rabia.

Pa casualidad ta un persona cu ta specializa den control di calidad.

Ora mi a puntre "pakico e cara tan bunita ey", el a mostra riba un establecimiento cu no ta di doña arubano, y a splica lo siguiente.

"Mi a para dilanti e sapato di 95 florin y mi a bisa e mucha muher cu e prijs aki ta mucho caro pa un sapato di plastic.

E juffrouw a laga sa na manera brutal: "ami no ta pone prijs, y ta cuero esey ta!"

Un presunto doña a yega cerca dje, y el a reclama e meneer cu e sapato ta mucho caro pa ta sapato di plastic.

Meneer a rabia y expresa na manera brutal: "Aki ta cuero nos ta

bende y nada di plastic".

E dama a menaza di laga controlador di gobierno bin controla y a sali bay y a topami e momento ey pa relata loke a pasa..

ATARDI:..... Atardi mi a haya un yamada di e señora. El a splica cu el a pasa na e mes lugar atardi cu un conocir cu tambe ta di experiencia y pa colmo:..... "e sapato di plastic y varios otro a "desaparece" di riba e rekki y a pone "slof" na nan lugar.

SERVICIO EXCELENTE DI DOUANE

Un otro caso cu a drenta den mi cabez ta experiencia di un dama cu recientemente a bolbe di Hulanda, despues di vacacion.

Na Hulanda a bin resulta cu pa bolbe Aruba cu avion, ta cierto cantidad di kilo so e mag viaha cune.

Su carga na Hulanda a wordo encarga na un compania di transporte cu lo percura pa nan yega Aruba pe cu barco.

E carga ta na Aruba poco mas di dos siman caba, y te cu ayera e no por a saca esaki na General Air Service. (no ta falta di G.A.S.)

El a yama telefon, el a bishita e lugar, pero no por haya su carga.

Keto bay ta e mes contesta e ta haya: "No por saca nada di e container, pasobra Douane no ta bin haci control." Despues el a bin tende cu "no tin douanero pa bin controla carganan", mientras tanto su carga ta sigui dañá na aeropuerto, debi na e servicio excelente di Douane pa Arubanonan.

DOCUMENTACION DI RESIDENCIA

Mi ta masha fastioso den hopi sentido, ta sa hende no sa te ora cu nan ripara con fastioso mi por bira.

Algun siman pasa mes, mi a dicidi di compra cierto aparato pa cas.

Mi a wordo bisa cu na tal lugar tin e etc.

Ora mi a yega mi a topa cu e yiu cu ta atende e negoshi.

Mi a cana rond, tira un bista y meneer a conversa cu mi, contami tur cos di e negoshi, locual mi tabata sa caba di tempo su tata a cuminza cune.

Ora mi a dicidi, mi a bisa cu mi ta paga mitar di e prijs, algun cien florin y fin di luna mi ta paga e otro mitar.

Aki tur cos a cambia.

Mi mester a trece no un recibo di telefon, pero tambe un recibo di awa, un di coriente, 2 payslip, y e sorpresa di mas grandi tabata cu mi mester bay senso busca un papel di 5 florin di mi residencia na Aruba.

Mi a gradici y a cuminza cana bay.

Saliendo mi a topa cu Papa. Si mi bin cu tur e documentacion, e ta dunami 6 luna mes pa paga.

Mi a gradici'e y sali bay. Nunca mas un sinverguenza manera mi, un ladron, un tirador di para cu mi ta, un mal pagado cu mi ta, ta drenta ey den. Asina mi a sinti mi mes.

TIN MOMENTO BON TAMBE

Pero tin momento cu bo ta sintibo bon tambe.

Tabata un dialuna dos siman pasa, mi a reverse, dal den porta di un auto, cu mi no a mira, cu a para mi tras.

E señora colombiano a sali: "Ay Juby, ki mala suerte mi tin!" El a contami con otronan a dal su auto aki y aya y awor ta esaki.

M'a bise busca un sacador di sla, bin cerca mi aki mey ora na oficina y nos ta regla esaki. (Ta un señora cu mi conoce)

El a yega basta despues, cu oferta di sacador di sla. Mi a yama e persona, Nelson Richardson, den Dr. Henriquezstraat y bise drecha porta di e auto, mandami e recibo.

Conociendo e problema cu e señora a haya su mes aden, mi a huur un auto pa su casa Arubano por a bay trabao, y pa e por hiba mucha nan school y busca nan na school, pa 2 dia cu Nelson lo traha riba nan auto.

Pero e dia siguiente, ata mi yiu a dal e auto parti dilanti den otro auto. Atami cu otro problema.

E señora a bin cerca mi cu su cuenta di Nelson, mi a regla e asunto mes ora, y el a conta Nelson di e problema di mi.

Nelson a bise pa mi trece e auto pe, e ta traha riba dje, drecha locual tin cu drecha y mi ta pague fin di luna mes.

Esaki ta cosnan chiquito cu bo ta aprecia di hende. Aki no ta asunto di percura pa bin cu papel di nacimiento, di casamento, di residencia, di divorcio of di bo morto, pa ta sigur cu ta 'bo mes.

Juby Naar.